

Obraćanje visokog predstavnika građanima BiH

Dobro veče,

Ja sam Christian Schwarz-Schilling. Kao što znate, upravo sam na dužnosti visokog predstavnika naslijedio Paddyja Ashdowna. U Bosnu i Hercegovinu sam dolazio mnogo puta od 1992. godine, a od danas ću ovdje s vama živjeti i raditi

Radujem se što ću živjeti među prijateljima.

Ovo imenovanje za mene predstavlja veliku čast. Ono sobom nosi ozbiljnu odgovornost, ali isto tako i priliku da iskoristim stečeno iskustvo – iskustvo političara, poduzetnika i međunarodnog medijatora – kako bih vama pružio podršku u trenutku od odlučujućeg značaja za ovu zemlju.

Znate da ću ja možda biti posljednji visoki predstavnik. Ova funkcija i ovaj ured će u bliskoj budućnosti prestati da postoje. To ne treba da predstavlja razlog za zabrinutost. Svi treba da pozdravimo ovu promjenu kao odraz činjenice da je otvoreno novo poglavlje u odnosima ove zemlje sa svijetom a naročito sa ostatkom Evrope.

Prestanak rada ovog ureda neće biti kraj međunarodnog angažmana u Bosni i Hercegovini. Budućnost ove zemlje je u evropskim i evro-atlantskim integracijama. Ja neću napustiti zemlju kada se ugasi funkcija visokog predstavnika. Naprotiv, ostat ću u BiH kao specijalni predstavnik Evropske unije, kako bih pomogao u usmjeravanju procesa integracije.

Tačno je da Evropa nije svaki put uradila ispravnu stvar za ovu zemlju. Toga sam potpuno svjestan. Upravo zbog toga sam 1992. godine podnio ostavku na dužnost u njemačkoj Vladi, u znak protesta zbog našeg zajedničkog neuspjeha da zaustavimo

rat u Bosni i Hercegovini.

Smatrao sam da smo pola stoljeća po okončanju Drugog svjetskog rata – kada smo se zakleli da više nikada nećemo dozvoliti da se desi genocid – ovaj princip iznevjerili. Gledajući etničko čišćenje i ljudsku patnju koja ja bila gotovo bez presedana, shvatio sam da je rad na ostvarenju pravde i mira u Bosni i Hercegovini važniji od moje karijere ministra pošta i telekomunikacija u Njemačkoj.

Od tog trenutka, sve više sam se angažirao u Bosni i Hercegovini.

Tokom rata, uključio sam se u dostavu humanitarne pomoći i stavio se na raspolaganje. Kao međunarodni medijator na lokalnom nivou, počeo sam raditi u posljednjoj godini rata. U ovom svojstvu, proveo sam deset godina putujući širom zemlje – od Bihaća do Bijeljine, od Dervente do Mostara – radeći sa lokalnim liderima na jačanju dijaloga i izgradnji povjerenja, kako bi obični građani mogli ponovno izgraditi svoje živote.

Vidio sam koliko se ova zemlja promijenila od 1995. godine. Svako ko je bio svjedokom ove preobrazbe može samo biti impresioniran.

Dok sam radio kao medijator, stekao sam duboko poštovanje prema građanima Bosne i Hercegovine svih nacionalnosti, poštovanje prema, vašoj unutarnjoj snazi i sposobnosti da prevaziđete teškoće. Ovo su vrijednosti koje ćete morati da iskoristite u narednim godinama – kada svoju sudbinu budete preuzeli u sopstvene ruke.

Postoje realni izgledi da će, tokom mog mandata, Bosna i Hercegovina potpisati Sporazum o stabilizaciji i pridruživanju sa Evropskom unijom i priključiti se NATO programu Partnerstvo za mir.

Ovo su ključne prekretnice na putu ka evropskim i evro-atlantskim integracijama. Poznati su koraci koje je potrebno

napraviti da bi se postigli ovi ciljevi i oni će predstavljati plan za moje aktivnosti.

Međutim, Bosna i Hercegovina mora biti potpuno suverena država kako bi mogla poduzeti ove korake.

To znači da se ja moram povući.

Kao visoki predstavnik, imam ovlaštenja da namećem zakone, ali ne mogu nametnuti pomirenje i ne mogu nametnuti prosperitet.

Vi i vaši izabrani lideri ćete odlučivati o tome.

U svakom demokratskom društvu, izbori predstavljaju krunski trenutak. Izbor koji naprave birači ove zemlje, a ne izbor novog Visokog predstavnika, odlučiti će o načinu na koji će se ova zemlja voditi.

Izbori, planirani za oktobar ove godine, predstavljaju priliku da se razmotri pravac kojim će BiH ići naprijed, i da se izaberu lideri koji su najsposobniji da osiguraju evropsku budućnost BiH. Vaši lideri, a ne ja, će biti odgovorni za pregovore o uslovima i brzini kojom će vaša zemlja ući u Evropu.

Oni među nama koji su proživjeli najcrnije dane Evrope i doživjeli razvoj Evropske unije i pridruživanje zemalja koje su nekada bile dio Istočnog bloka, znaju koliko daleko i koliko brzo se može stići kada zemlja ide pravim putem.

Poznajući ovu zemlju i njene građane, ne sumnjam da ovaj proces može na isti način biti uspješan i u Bosni i Hercegovini.

Zato, radimo zajedno kako bismo izgradili evropsku budućnost za ovu zemlju i njene divne ljude.

Hvala.